

Was merr su babbeld

Also isch gieh donn mol.
Hosde Geld debei?
Ja.
Wiffell hosden?
Ei finf Euro.
Bissde verriggd.
Was donn?
Mett finf Euro bei de Stommdisch ze gieh.
No ja, donn gebb merr mol noch enn Finfer.
Doo hosde enn Zwonnischer.
Dess iss ze vill. Hosde nitt enn Zehner?
Donn gebb merr de Zwonnischer widder.
Hier. Isch gieh donn.
Halt, isch holder erst noch enn Zehner.
Ich habb nitt gern su vill Geld oistigge.
Enn Zehner iss doch nitt vill Geld.
No ja, isch due joo nitt ze vill ausgewwe.
Du dust ewe garnitt vill ausgewwe.
Gelle?
Aach nitt ferr misch.
Wie, ferr disch?
Du kennst merr joo mol was kaafe.
Isch, was kaafe? Ei was donn?
Mach derr mol Gedonke.
Doodriwwer mach isch merr koo Gedonke.
Unn warum nitt?
Wenn du was hawwe willst mussde ...
... muss isch merr Gedonke mache, odder?
Ja, dess mussde.
Du kennst misch joo mol iwwerrasche.
Iwwerrasche? Ei mett was donn?
Mett e paar Blumme odder su ebbes.
Blumme – die schneidsde doch im Gadde ab.
Doodrum giehts joo nitt.
Ei um wasden sunnst?
Um die Iwwerraschung.
Mett Blumme?
Ja, mett Blumme.
Gut, donn holl isch jetz enn Strauß.
Naa.
Wie naa?
Naa.
De erst willsde Blumme unn donn nitt.
Weils koo Iwwerraschung iss.
No ja, isch denk die Woch emol droo.

Hosde donn Geld ferr die Blumme?

Ei du host merr doch enn Zehner gewwe.

No ja.

Was no ja?

Dess werdd scheene Blumme gewwe.

Ja, dess moon isch aach.

Ferr enn Zehner, moon isch.

Also donn gebb merr enn Zwonnischer.

Habb isch doch gesaad, hier hosden.

Iss gut, dass du nitt dess Kättche bist.

Ei warum donn?

Dess Kättche iss vunn de Paula gefroochd worrn, wie se dess mache deet meddem Sunndaachsgeld ferrn Schorsch unn doo hottse gesaad, der will jeden Sunndaach enn Zwonnischer.

Enn Zwonnischer?, frächt die Paula, was mächden der mett dem ville Geld?

Nix, seet doo dess Kättche, isch gewwem joo nor enn Finfer.

Eiern Honnes